

ERA CRASTA

Numerò 38 · Deseme 2004

Impresi sense adreça

Bon Nadau entà toti

Estimadi vesins,

Quan er an arribe ara fin, mos desiram PATZ, AMOR e ARMONIA entath nau an, mès, abantes, dilhèu convierie hèr ua brèu analisi de çò qu'a estat aguest an 2004. Sonque vos demani que li panetz ath temps ua estona entà reflexionar e pensar coma va eth mon, eth nòste país e era nòsta pròpia casa. Que mos demanem quin grad de responsabilitat auem, pr'amor que cadun de nosati, en tot préner decisions, èm es protagonistes e èm capables d'expressar-mos e actuar segontes era nòsta consciència.

Amassa participam ena construccion d'un mon qu'eretan es que vien darrèr nòste, e non ei just pensar qu'eri ac solucionaran. Ei per açò que vos demani era vòsta participacion enes ahèrs deth nòste pòble e deth nòste municipi, e era vòsta opinion e suggeréncies.

Nosati, des der Ajuntament de Vielha-Mijaran, volem balhar un bon servici e arribar a hèr eth nòste trabalh çò de melhor possible, ena mesura que sigam capables e entath ben de tota era comunautat.

"Non i a problèmes que non se poguen resòlver se i dedicam temps, dialòg e era mès bona intencion per part de toti".

Ei aguest eth messatge que vos volem hèr a arribar, sense desbrembar eth nòste mès gran desir de prosperitat, alegria e benaürança entà cada família e entà cadun des que demoratz en Municipi de Vielha-Mijaran en aguest an que tuste enes nòstes pòrtes, er an 2005.

En nòm pròpi e en dera Corporacion Municipau, voi desirar-vos un Bon Nadau e un Eròs An Nau.

JUAN RIU LLONCH

Alcalde der Ajuntament Vielha - Mijaran

Viuendes de proteccion oficiala

Er Ajuntament de Vielha-Mijaran a dat eth vist e platz as bases deth concors entà poder accedir as viuendes de proteccion oficiala en regim de loguèr, promoigudes per "Institut Català del Sòl", ena Av. Maladeta, num. 17 de Vielha.

Era promocion ei de 20 abitadges d'ua e dues abitacions, damb ua superfícia utila d'entre 33,24 m² e 59,82 m², e i a 20 places de parcatge vinculades: 18-interiores e 2 exteriores, damb una superfícia utila de 14,65 m² per plaça.

ETH LOGUER SERÀ PER UN PLAÇ DE CINC ANS NON PRORROGABLES, e s'adreçaràn as joeni.

Es condicions entà accedir-i son.

- Qu'eth o es titulars dera sollicitud agen ua antiguitat de 7 ans d'empadronament en Municipi de Vielha-Mijaran.

- Que toti es-membres dera unitat familiara que i vagen a viuer agen mens de 30 ans.

- Que cap des persones que consten ena sollicitud sigue propietària d'ua viuenda.

- En cas d'èster adjudicatari, calerà hèr ua declaracion de responsabilitat conforme era viuenda serà domorança abituau e permanenta.

- Non auer auut cap finançament qualificat procedent de plans estataus entara viuenda pendent es 10 ans immediatament anteriors ara sollicitud actuau.

- Qu'es ingressi pròpis siguen superiors a 6.000,00 € en còmput anuau der an 2003 (ingressi bruts).

- Qu'es ingressi pròpis ponderats siguen iguals o inferiors a 3,5 viatges eth salari mínim interprofessionau vigent (SMI), en còmput

anuau der an 2003 (Basa imposabla prealabla ara deduccion deth mínim de personau e familiar dera declaracion dera renda der an 2003), ei a dèder:

Famílies d'1 o 2 membres

24.565,33 €

Famílies de 3 membres

25.325,09 €

Famílies de 4 membres

26.414,34 €

Serà motiu d'excludiment:

- Er incompliment o manca d'acreditacion des requisits establidi.

- Era faussetat des donades o des documents aportadi.

- Qu'era sollicitud sigue integrada per un nombre totau de membres que supèr eth ràtio d'ocupacion maxima recomanada, mercada peth Decrèt 259/2003, de 21 d'octobre, sus es requisits mínims d'abitabilitat enes bastisses d'abitadges e dera cedulla d'abitabilitat, ei a dèder que coma maxim i poderàn viuer 4 persones.

Era adjudicacion d'aguestes viuendes se harà solet e exclusivament mejançant sorteg entre totes es sollicituds que complisquen es requisits mercadi.

Era "Direcció General d'Actuacions Comunitàries i Cíviques" deth Departament de Benestar e Família dera Generalitat de Catalonha daurirà eth període d'inscripcion e de presentacion de documentacion que serà deth 13 de deseme de 2004 ath 13 de gèr de 2005. Es sollicituts podran arremassar-se en Ajuntament de Vielha Mijaran, a compdar d'aguesta data.

SUMARI

1

Bon Nadau entà toti

Viuendes de proteccion oficiala

2

Naua bossa de trabalh der Ajuntament de Vielha-Mijaran

Modificacion des normes subsidiàries dera Val d'Aran sector des Anglades e Prat de Bodigues en Vielha.

Aplicacion dera taxa de contenidors de tarcum

Medalha deth Torisme de Catalonha

Corsa nacionau de crambèrs.

3

Gessudes des escolans deth CEIP Garona

VIIau. Concors de Recitacion d'Aran

Amassades informatives sus seguretat viau.

4

Agenda d'activitats

Gala de Nadau de patinatge artistic

Teatre en Vielha

Es Reis d'Orient arriben en Vielha

Naua bossa de trabalh der Ajuntament de Vielha-Mijaran

Entà totes es personas as que pogue interessar, er Ajuntament de Vielha-Mijaran, a daurit ua bossa de trabalh tà puericultors/es e auxiliar de puericultor/a, damb er objectiu de d'arténher es curriculums des

personas, qu'auent es titolacions que se demanen, poguen èster interessadi en curbir places temporaus quan sigue de besonh en aguesta escòla mairau.

Modificacion des normes subsidiàries dera Val d'Aran sector des Anglades e Prat de Bodigues en Vielha.

Er objectè d'aguesta modificacion ei crear un nau sector de planejament que permete obtier solèr public entà garantir un nau accés ath pòble de Gausac, entà un camp de fòtbol municipau e tanben entà crear un airau de coishin que permete assegurar era continuitat visuau des dus nuclèus urbans de Vielha e Gausac.

ACCÈS ATH PÒBLE DE GAUSAC.- Es besonhs d'aguesta actuacion son clares, pr'amor que damb eth creishement urbanistic deth nuclèu de Gausac s'a vist collapsat eth sòn accés, en tot auer ena entrada deth pòble, ath cant dera Glèisa, ua amplada de tot just 5 mètres, e ath delà cau tier en compde qu'er accés peth carrèr Major ei fòrça dificultós, autant entara gent com entàs veïculs, per èster fòrça arribent. Actuaument, e en tot aprofitar que se redacte eth Plan Parciau 1 de Gausac, er Ajuntament a optat per hèr a arribar un viau des d'aguest sector enquiath miei deth pòble, just en front dera carretèra de Varicauba.

PLAÇAMENT D'UA ZÒNA ESPORTIVA.- Un aute des objectes d'aguesta modificacion ei hèr ua zòna esportiva, damb eth sòn corresponent camp de fòtbol, en tot sajar de respectar eth plaçament deth camp actuau.

CONTRÒTLE PAISAGISTIC E ZÒNA VERDA.- Entà sajar d'esuitar qu'es nuclèus urbans de Vielha e de Gausac se

junten arribant a configurar un contunh urban, s'a previst eth desenvolupament adequat d'aguest sector en tot arténher era proteccion dera zòna deth Barranc, qu'amassa damb es critèris dispausadi des der Ajuntament en Plan Parciau 1 de Gausac, formaràn ua zòna verda contunha que protegirà era perspectiva des dus nuclèus urbans.

Ath delà, tanben se vò assegurar eth contròtle dera fin dera trama urbana de Vielha, era sua façada, amendrint er impacte de quauques volumetries existents.

Era prepausta sage de hèr un creishement ço mèns compacte possible, entà poder auer eth maxim solèr liure, ja sigue privat o public, e atau disposar deth maxim solèr public entà equipaments e zòna verda, sense perjudici des drets deth privat, e, per tant, sense modificar era edificabilitat e era densitat.

Eth Plan Parciau de Vielha-Gausac que desvoloparà aguest sector complirà damb es resèrves minimas que seguissen:

12.000 m² entath sistèma d'espacis liures publics.

14.000 m² entath sistèma d'equipaments comunitaris.

8.315 m² entath sistèma de comunicacions.

385 m² entara resèrva d'espacis tecnics

Eth minim deth totau de Sistemes Urbanistics serà de 34.665 m²

Aplicacion dera taxa de contenedors de tarcum

Pr'amor des irregularitats detectades en quauques òbres deth Municipi ara ora d'arremassar eth tarcum, e en tot èster a viatges un grèu problèma de salubritat entàs vesins deth pòble ath delà dera imatge negativa qu'auffrisen, a compdar der 1 de gèr de 2005 er Ajuntament aplicarà damb rigoositat era Ordenança Fiscala nùm. 16, era quau regule era Taxa per aucupacion de solèr public damb

materiaus, marchandises, tarcums, eca..., e a on se contèmples especiaument es nomentadi "containers" que s'utilizaràn entà recuèlher es tarcums des òbres.

Amassa damb era licéncia d'òbres, es promotors auràn de sollicitar era autorizacion entath plaçament d'un "container" ena via publica e er Ajuntament determinarà eth lòc, eth plaç e era tarifa a pagar.

Medalha deth Torisme de Catalonha

Er Generalitat de Catalonha a autrejat un an mèns es prèmis "Medalha deth Torisme de Catalonha", e entre es premiadi d'enguan i trapam a dus aranesi: ua vesia deth nòste municipi, era Sra. Consuelo Castel, deth

pòble d'Escunhau, e eth Sr. Walter Ankli de Les. Aguest prèmi se les a autrejat pera sua "dedicacion e esfòrc contunhat a favor deth sector toristic".

Corsa nacionau de crambèrs.

Er passat mes d'octobre se celebrèc era tradicionau Corsa Nacionau de Crambèrs, ena quau es participants an de recórrer ua distància de 100 m. en mens de 14 segons, e damb ua plata plea de cerveses. En aguest campionat i participen crambèrs de tot er Estat Espànhol e enguan eth guanhador a estat Francisco Cerrato, que trabalhe en Bar Era Plaça de Vielha, en tot compartir pòdiu damb dus crambèrs mèns, er un de Sevilla e er aute de Teruel.



Gessudes des escolans deth CEIP Garona

Deth 8 ath 15 de noveme es escolans des cycles miei e superior deth CEIP Garona an visitat era exposicion “Era vida enes castèths”, plaçada ena glèisa-musèu de Sant Joan d’Arties e patrocinada peth Conselh Generau d’Aran e era Fundacion “La Caixa”.

Aguesta exposicion ei un repàs visuau pes castèths medievaus que i auie en territòri catalan.

A compdar d’ua petita introduccion ena epòca medievau, e d’analisar coma èren es estructures basiques arquitectoniques des castèths des deth s. XI enquiath s. XIV, s’arriba a conèisher era vida vidanta dera sua gent e es sòns mejans de subsistència. Tanben se ve coma ère era guèrra e eth materiau bellic que hègen a servir, e qué hègen en sòn temps de léser es daunes e es cavalièrs.

D’un aute biais, e damb motiu dera celebracion dera IIau. Setmana dera Energia deth 2 ath 8 d’Octobre de 2004, es 56 escolans de 5au. de Primària deth CEIP Garona de Vielha,

tamb sies professors e acompanyadi per dus agents deth Còs des Mòssos d’Esquadra, visitèren era Estacion d’Aigües Residuaus (EDAR) de Vielha. Er objectiu d’aguesta visita ère qu’es escolans coneishessen eth foncionament dera planta depuradora.



VIIau. Concors de Recitacion d’Aran

Eth dia 20 de noveme se celebrèc en cine de Vielha eth VIIau. Concors de recitacion d’Aran, organizat pera associacion ALMOSC, a on i participèren es escolans deth CEIP Garona de Vielha. En aguest acte, sigueren escuelhudi entà representar ar estudi es alumnes que seguissen:

3au. cors

Alex Berart Broto
Paola Mononelles Caubet
Naila García Victoria

4au. cors

Marta Cester Farré
Jorge Ramos Ces
Laura Torres martagón

5au. cors

Yanira Carballo Alfaya
Cristina Sánchez Pamplona
Sofia Salillas Onco

6au. Cors

María Porté Jiménez
Carlos Domínguez Serrano
Alidé Sans mas.

Era guanhadora d’aguest concors de recitacion siguec era mainada de 3au. cors Paola Mononelles Caubet, damb era poesia “Er Aranés”, de Pol Jaquet Pous.



Amassades informatives sus seguretat viau.

Eth passat 18 de noveme, eth Còs de Policia dera Generalitat – Mòssos d’Esquadra – aprofitèren ua amassada dera Associacion de Mairs e Pairs d’Alumnes (AMPA) deth CEIP Garona de Vielha entà informar sus es perills qu’an es nòsti hilhs coma usatgèrs des vies.

Aguesta a estat era prumèra charrada que s’a amiat a tèrme en Catalonha, laguens d’un projècte conjunt entre eth Servicì Catalan de Transit, era Federacion d’Associacions de Pairs e Mairs d’Alumnes de Catalonha e es Mòssos d’Esquadra entà conscienciar e educar as pares, ja qu’eri son es principaus educadors des mainatges ath delà de representar un modèl a seguir, sustot per qu’es pares son normaument es conductors abituaus des veïculs a on viatgen es mainatges e mainades.

Es objectius dera charrada son:

- Reflexionar sus es perills dera mobilitat
- Detectar es conductes de risc des mainatges de 3 a 14 ans.
- Priorizar objectius pedagogics.
- Proposar activitats educatives.
- Identificar es encastres d’intervencion
- Avalorar era implantacion d’intervencions educatives ena educacion des hilhs.

Eth desenvolopament dera charrada siguec fòrça positiu, sustot pes manifestacions e aportacions que heren es pares e mares que i assistiren.

Agenda d'activitats

Xau. FIRA D'ANTIGUITATS, BROCANTERS e COLLECCIONISME DE VIELHA-MIJARAN

Eth dimarts, dia 28 de deseme, s'inaugurarà ena Sala Polivalenta de Vielha, era Xau. Fira d'Antiguitats, Brocanters e Colleccionisme de Vielha-Mijaran - Antic-Vielha, que demorarà dubèrta enquiath dimarts dia 4 de gèr de 2005. Er orari serà des 11.00 or. enquiàs 21.00 or. toti es dies exceptat eth dia 1 de gèr, que serà des 16.00 or. enquiàs 21.00 or. Eth prètz dera entrada serà de 3,5 €.

En aguesta detzau edicion i a prevista era participacion de 26 expositors, autant espanhòus coma de d'auti païsi, damb ua ampla aufèrta d'articles: mòbles, objèctes de colleccion, jòies, porcellanes, lampes, libres, cortines, vaishères e cristallèrs, esturments musicaus entre d'auti, damb un minim d'antiquitat de 50 ans o mès se son brocanters, e se son antiquaris era antiquitat des pèces ei superiora a 100 ans.

CONCÈRT D'ÒRGUE EN VIELHA

Eth dimèrcles, dia 28 de deseme entàs 20,15 or., i aurà un concèrt d'òrgue ena Glèisa de Sant Miquèu de Vielha a cargue der organiste José Santos de la Iglesia. Er acte ei organizat pera Conselheria de Cultura der Ajuntament de Vielha-Mijaran, e era entrada serà gratuïta. Eth programa que mos aufrirà serà eth que següis.

ANÒNIM (s.XVII) - Batalla de 5º tono
Francisco DE PERAZA (1564-1599) - [Tiento de] Medio registro alto de 1er tono
Joan Baptista CABANILLES (1644-1712) - Pasacalles de 1er tono
ANÒNIM (s.XVIII) - Toccata
Jan Pieterszoon SWEELINCK (1510-1621) - «Puer nobis nascitur»
(Eth Nèn a neishut entre nosati)
George STEENWICK (s.XVII) - «La Grevelinde»
Benjamin COSYN (s.XVII) - «The Goldfinch»
John TRAVERS (1703-1758) - Voluntary
Johann C.F. FISCHER (ca.1670-1746) - Txacona en Fa Major
Michel CORRETTE (1707-1795) - Offertoire «L'Eclatante»
Bernardo STORACE (s.XVII) - Ària sobre la «Spagnoletta»
Baldasare GALUPPI (1700-1785) - Sonata en Re Major Andante e Allegro
Andrea LUCHESSI (1741-1801) - Sonata en Fa Major

NÒTA: Se vòs participar en ERA CRASTA, ac pòs her en tot envià-mos era tua collaboracion ja sigue per corrèu ara adrèça AJUNTAMENT DE VIELHA c/ Sarriulèra 2, 25530 VIELHA. ben per Fax ath numerò 973 64 05 37 o ben per corrèu electronic, e-mail: ayuvielha@aranweb.com

Gala de Nadau de patinatge artistic

Eth dijaus, dia 30 de deseme ath ser, en Club Esportiu de Gèu Val d'Aran (CESGVA) amassa damb eth Palai de Gèu, organizaràn era dejà tradicionau Gala de Nadau de Patinatge Artistic.

Serà en Palai e Gèu de Vielha e es entrades poderàn comprar-se ena recepcion deth Palai, ja sigue per auança o ben eth madeish dia.

Teatre en Vielha

Laguens dera linha dejà abituau de celebrar ua serada de teatre cada prumèr dijaus de mes, damb era arribada deth nau an, tanben poderam contunhar gaudint d'aguestes activitats, tot e qu'era prumèra der an 2005, non serà enquiath dusau dijaus, ei a dèder eth dia 13 de gèr. "Catacrack" ei eth títol dera comedia trigada entà inaugurar er an nau, Interpretada pera companhia de teatre "La Baldufa".

Es autes sessions de teatre, seràn eth dijaus dia 3 de hereuèr, damb era òbra "Comiendo Paredes", e es dijaus dia 3 de març e 7 d'abriu de 2005.

Es Reis d'Orient arriben en Vielha

Eth dimèrcles, dia 5 de gèr, arribaràn es Reis d'Orient en Municipi de Vielha-Mijaran.

A compdar des 16,00 or., er Ajuntament de Vielha e era EMD de Gausac aufriràn ena sala deth pòble, a tota era mainadèra e as sòns pairs un chicolate plan bon e vin caud, en tant que demoren era arribada des reis ena sala deth pòble de Gausac, qu'ei prevista entàs 16,30 or.

Tàs 18.15 or. es reis gesseràn de Gausac pujadi enes sues carròces, e passejaràn per Vielha enquia arribar ena Plaça dera Glèisa. Aquiu les demorarà era Corporacion Municipau, que les convidaràn a pujar en balcon der Ajuntament, entà qu'eth rei Melchor hèsqe eth sòn discors.

Ath torn des 20.00 or., toti aqueri mainatges e mainades que volguen saludar-les e parlar damb eri ac poderàn hèr en cine de Vielha.



D.L.: L-222-01
Dessenh: Aitxia Grustan. Val d'Aran 625 14 25 05